



## REPUBLIKA E SHQIPËRISË

### KUVENDI

*Sekretariati për Procedurat, Votimet dhe Etikën*

Nr. 3/85 / Prot.

Tiranë, më 19.10.2023

### V E N D I M

Nr. 42, datë 19.10.2023

### PËR MARRJE MASE DISIPLINORE

Sekretariati për Procedurat, Votimet dhe Etikën, në bazë të nenit 10/2 dhe nenit 65/2, pika 1 të Rregullores së Kuvendit, në dt.19.10.2023 shqyrtoi çështjen me:

**Kërkues:** Një grup prej 20 (njëzet) deputetësh të Grupit Parlamentar të Partisë Socialiste

**Objekt:** - Marrja e masës disiplinore ndaj deputetëve Sali Berisha, Flamur Noka, Albana Vokshi, Xhelal Mziu, Gazmend Bardhi, Bledion Nallbati, Edmond Spaho, Saimir Korreshi, Lindita Metaliaj, Ramadan Likaj, Luan Baçi, Lefter Gështhenja, Ina Zhupa, Helidon Bushati, Isuf Çela, Asllan Dogjani, Bujar Leskaj, Lodovik Hasani, Tritan Shehu, Greta Bardeli, Dhurata Çupi, Sorina Kote, Kastriot Piroli, Kasëm Mahmutaj, Tomor Alizoti, Qani Xhafaj, sipas nenit 65/1, pika 1, gërma a) dhe pika 4, dhe neni 63, pika 1 gërma d), të Rregullores së Kuvendit dhe Kodit të Sjelljes së Deputetit, neni 3, pika dh) dhe ë) dhe nenin 8, pika 2, gërma b) dhe neni 33.

- Thirrja e Mbledhjes së Sekretariatit për Procedurat, Votimet dhe Etikën për vlerësimin dhe marrjen e masës disiplinore ndaj disa deputetëve.

Sekretariati u njoh me kërkesën e 20 deputetëve të Grupit Parlamentar të Partisë Socialiste datë 19.10.2023 dhe u mbledh menjëherë sipas kërkesës së Kryesueses së seancës plenare të së njëjtës datë ora 10.00, Znj. Ermonela Felaj dhe në bazë të njoftimit datë 19.10.2023 për mbledhjen e sekretariatit në datën 19.10.2023, në orën 12.00, bazuar në:

- Nenin 65/2, pika 1 të Rregullores që parashikon se “... Mbledhja e sekretariatit zhvillohet brenda 48 orëve nga depozitimi i kërkesës”.
- Nenin 10, pika 5 e Rregullores që parashikon se: “...5. Rregullat e detajuara të funksionimit të sekretariateve, miratohen nga Byroja e Kuvendit”.

- Nenin 6 dhe 7 të Rregullores “Për përcaktimin e Rregullave procedurale të funksionimit të sekretariateve të Kuvendit të Shqipërisë”, miratuar me vendim të Byrosë së Kuvendit nr. 53, datë 13.05.2020, ku në nenin 6, pika 2, parashikohet se: “...2. Mbledhja e sekretariatit si rregull thirret nga sekretari i cili përcakton rendin e ditës, datën dhe orën e zhvillimit të saj. Njoftimi i sekretarit për thirrjen e mbledhjes shoqërohet me rendin e ditës si dhe me çdo akt, informacion apo dokument tjetër, i cili do të merret në shqyrtim apo që u shërbën anëtarëve të sekretariatit për diskutim”; ndërsa në nenin 7, pika 1 përcaktohet se: “1. mbledhjet e sekretariatit janë të vlefshme kur në to merr pjesë më shumë se gjysma e gjithë anëtarëve të sekretariatit....”.

Në mbledhje morën pjesë 3 anëtarë të sekretariatit nga 5 anëtarë të tij, që përbëjnë kuorumin e nevojshëm për vlefshmërinë e mbledhjes.

Nisur nga ngjarja e paprecedentë e ndodhur në seancën plenare të datës 19.10.2023 dhe në shkelje të rëndë të Rregullores së Kuvendit dhe Kodit të Sjelljes së Deputetit, sekretariati çmoi të vijojë mbledhjen e thirrur menjëherë, duke vlerësuar se veprimet që pretendohet si shkelje janë flagrante. Ndërkohë që sekretariati zhvillonte mbledhjen, deputetët e opozitës vijonin të mbanin të zaptuar sallën e seancave plenare.

Sekretariati, fillimisht çmon të theksojë se këto situata janë të papranueshme për veprimtarinë normale parlamentare, bien ndesh me të gjitha parimet e parlamentarizmit dhe sekretariati ndihet i keqardhur që vihet para kushteve të shqyrtimit të kërkesave të tilla ndaj kolegëve deputetë të opozitës, për të cilët ashtu si për çdo deputet të Kuvendit, interesi publik kërkon mbi të gjitha, që funksionet e deputetit të ushtrohen në përputhje me rregullat e sjelljes dhe parimin e përgjegjshmërisë.

Sipas kërkesës për masa disiplinore ndaj 20 deputetëve të Grupit Parlamentar të Partisë Socialiste për deputetët Sali Berisha, Flamur Noka, Albana Vokshi, Xhelal Mziu, Gazmend Bardhi, Bledion Nallbati, Edmond Spaho, Saimir Korreshi, Lindita Metaliaj, Ramadan Likaj, Luan Baçi, Lefter Gështenja, Ina Zhupa, Helidon Bushati, Isuf Çela, Asllan Dogjani, Bujar Leskaj, Lodovik Hasani, Tritan Shehu, Greta Bardeli, Dhurata Çupi, Sorina Kote, Kastriot Piroli, Kasëm Mahmutaj, Tomor Alizoti, Qani Xhafaj, lidhur me situatën e krijuar përpara nisjes së seancës plenare të datës 19.10.2023, deputetët e opozitës me sjelljet e tyre bllokuan hyrjen e deputetëve të Grupit Parlamentar të PS në sallën e seancave plenare, hoqën kartat e tyre (deputetëve të PS) nga pajisjet elektronike të votimit, bllokuan vendet ku ulet Kryetarja e Kuvendit dhe Kabineti Qeveritar, si dhe dyert hyrëse të tyre duke vendosur karrige; në këto kushte, sipas kërkesës, u bë i pamundur zhvillimi i seancës plenare, duke mos lejuar diskutimin, shqyrtimin dhe votimin e projektligjeve dhe projektvendimeve të parashikuara në rendin e ditës sipas urdhërit të Kryetares së Kuvendit në këtë seancë plenare.

Sekretariati kërkoi pamjet filmike të sallës së seancës plenare nga momenti kur deputetët e Grupit Parlamentar të PS hynë në sallë për të nisur seancën plenare të datës 19.10.2023.

Sekretariati për Procedurat, Votimet dhe Etikën, në vlerësim të sa parashtrohet në kërkesën e 20 deputetëve, dhe pamjeve filmike që mori në shqyrtim dhe pas diskutimeve, vlerëson se kërkesa për marrjen e masave disiplinore ndaj disa deputetëve të opozitës është e drejtë dhe duhet pranuar.

Sekretariati vlerëson se disa deputetë ndaj të cilëve kërkohet masa disiplinore kanë shkelur detyrimet e nenit 65/1, pika 1, germa a) pasi kanë kryer veprime që pengojnë zhvillimin e rregullt të seancës plenare si dhe nuk kanë respektuar nenin 3, germa dh) dhe ë), neni 8, pika 2 germa b) të Kodit Etik - Rregullat e Sjelljes në Kuvend.

Rezulton nga pamjet filmike të qarta se të gjitha sjelljet e pretenduara në kërkesën për masë disiplinore kanë ndodhur dhe janë kryer nga disa deputetë të opozitës. Deputetët Dhurata Cupi, Tomor Alizoti dhe Qani Xhafaj nuk duket nga pamjet filmike se kanë kryer veprime penguese si deputetët e tjerë. Të gjithë deputetëve, ndaj të cilëve kërkohet marrja e masës disiplinore i'u tërhoq vëmendja nga Kryesuesja e seancës plenare, e cila në kushtet e pamundësisë për zhvillimin normal të seancës plenare njoftoi shtyrjen e saj.

Sekretariati risjell në vëmendje se Gjykata Evropiane për të Drejtat e Njeriut, në vendimin e Dhomës së Madhe të datës 17 maj 2016, çështja "Karacsony dhe të tjerë kundër Hungarisë", aplikimet nr.42461/13 dhe 44357/13, ndër të tjera, ka mbajtur qendrimin se:

*146. .... Gjykata vlerëson se ekziston një interes publik mbizotërues për të siguruar që Parlamenti, duke respektuar kërkesat e një debati të lirë, të mund të funksionojë në mënyrë efektive dhe të ndjekë misionin e tij në një shoqëri demokratike.*

*155. ... Sanksionet e menjëhershme (të cilat nuk janë në diskutim në rastin konkret) vendosen në rast të një çrregullimi të rëndë të rendit parlamentar dhe për sa i përket masave mbrojtëse procedurale, ato do të kërkonin një paralajmërim. Megjithatë, mund të parashikohet gjithashtu që në raste ekstreme nuk do të kërkohet asnjë paralajmërim. Në këtë kontekst, arsyetimi do të ishte se fjalimi ose sjellja qartazi abuzive e një deputeti anulon mbrojtjen e të drejtës së tij/saj për lirinë e shprehjes ose mund të konsiderohet si shpërdorim i së drejtës.*

Sekretariati nënvizon se insinuata që krijohen artificialisht, për interesa politike, të qëllimshme apo jo, pa përdorur mjetet ligjore që deputetit i njeh ligji dhe Rregullorja e Kuvendit janë të dëmshme dhe vijnë në kundërshtim me interesin publik. Në vend të forcës, zaptimit, e sjelljeve të papërgjeshme, është detyrë e përgjegjësi e deputetit të ndjekë parimet e parlamentarizmit, rrugën e dialogut, frymën e bashkëpunimit, ushtrimin e të drejtave që njeh ligji, sepse këto janë çfarë kërkon interesi publik.

Sekretariati vlerëson se situata anormale për bllokimin e veprimtarisë parlamentare nga një grup deputetësh të opozitës, sic rezulton nga pamjet filmike, pengoi jo vetëm zhvillimin normal të seancës, por pengoi edhe pjesën tjetër të deputetëve, të ushtronin me përgjegjshmëri funksionet e tyre në sallën plenare (seanca u shty, diskutimi dhe votimi i projektakteve u shty në pamundësi të niste seanca plenare).

Veprimtaria e çdo deputeti duhet të përshkohet gjatë gjithë kohës që ai ushtron këtë funksion nga përgjegjshmëria, ndershmëria dhe korrektesa. Deputetët nuk mund të pretendojnë cënim të të drejtave të tyre, pasi funksionimi normal i seancës plenare të Kuvendit prevalon mbi të drejtat e deputetëve, kur sjelljet e tyre vijnë në kundërshtim me Rregulloren dhe normat e Kodin e Sjelljes.

Në përfundim të sa më sipër, sekretariati vlerëson se janë kryer shkelje të rënda të etikës parlamentare nga ana e deputeteve Sali Berisha, Flamur Noka, Albana Vokshi, Xhelal Mziu, Gazmend Bardhi, Bledion Nallbati, Edmond Spaho, Saimir Korreshi, Lindita Metaliaj, Ramadan Likaj, Luan Baçi, Lefter Gështenja, Ina Zhupa, Helidon Bushati, Isuf Çela, Asllan Dogjani, Bujar Leskaj, Lodovik Hasani, Tritan Shehu, Greta Bardeli, Sorina Kote, Kastriot Piroli, Kasëm Mahmutaj, duke bërë të pamundur zhvillimin normal të seancës plenare të datës 19.10.2023.

Sa më sipër Sekretariati për Procedurat, Votimet dhe Etikën në zbatim të nenit 10/2, pika 2 dhe 5, nenit 63, pika 1, gërma d), nenit 65/1, pika 1, gërma a) dhe nenit 65/2 të Rregullores së Kuvendit dhe neni 8 të Kodit të Sjelljes së Deputetit, me unanimitet

### V E N D O S I :

1. Marrjen e masës disiplinore "Përrjashtim nga pjesëmarrja në komisione dhe në seancë plenare për 10 (dhjetë) ditë" për secilin nga deputetët Sali Berisha, Flamur Noka, Albana Vokshi, Xhelal Mziu, Gazmend Bardhi, Bledion Nallbati, Edmond Spaho, Saimir Korreshi, Lindita Metaliaj, Ramadan Likaj, Luan Baçi, Lefter Gështenja, Ina Zhupa, Helidon Bushati, Isuf Çela, Asllan Dogjani, Bujar Leskaj, Lodovik Hasani, Tritan Shehu, Greta Bardeli, Sorina Kote, Kastriot Piroli dhe Kasëm Mahmutaj, duke filluar nga data 20.10.2023 deri më datë 30.10.2023.
2. Ngarkohet "Shërbimi i Sigurisë në Kuvend" dhe Sekretari i Përgjithshëm i Kuvendit për zbatimin e këtij vendimi.
3. Ky vendim mund të ankimohet nga deputeti brenda 2 (dy) ditëve pranë Byrosë së Kuvendit.
4. Ky vendim hyn në fuqi më datë 19.10.2023.

SEKRETARE

Klotilda BUSHKA

